

INTERNA REGULARO

de la Internacia Ligo de Esperantistaj Instruistoj

===== markado=====

Ĉi tiu dokumento indikas la modifojn al la interna regularo kiujn akceptis komitatanoj en Kopenhago en julio 2011, ankaŭ tiujn rete voĉdonotajn, kaj tiujn senditajn al la regulara komisiono kaj estraro por plia prilaboro. Ekzistas pura versio de la nuntempe valida regularo (fine de 2011). Simila dokumento-paro ekzistas por la Statuto, kiu estis ŝanĝita ĉefe en Kopenhago, sed du pliaj modifoj estis rete akceptitaj en novembro 2011.

Jen la markado uzita:

- Teksto akceptita en Kopenhago.
- Teksto plusendita al la regulara komisiono
- Teksto rete voĉdonota frue en 2012.

===== komenco de la regularo =====

Tiu ĉi regularo estas por interna uzado de la Ligo kaj celas kompletigi la Statuton. La numerado de la artikoloj sekvas tiun de la Statuto. Se iu artikolo el la Statuto ne estas menciita en ĉi tiu regularo, ĝi ne bezonas aldonon. La Interna Regularo estas, post ŝanĝiĝoj, aprobita en la komitatkunsido de la 32a ILEI-konferenco la 12an de aŭgusto 1998 en Montpellier, Francio.

Artikolo 1

1.1

La estraro proponas oficialajn versiojn de la liga nomo en aliaj lingvoj; tiujn aprobas la Komitato.

Artikolo 2

2.2

La Ligo estas aliĝinta faka asocio al Universala Esperanto-Asocio.

Artikolo 4

ELDONAĴOJ:

4.9.1

La oficiala organo de la Ligo nomiĝas "Internacia Pedagogia Revuo", mallonge "IPR". (Literatur-referenca mallongigo: Int.Pedag.Rev.) IPR aperas minimume tri fojojn en la jaro.

Eks-teksto:

La regula eldonaĵo de la Ligo nomiĝas "Internacia Pedagogia Revuo", mallonge "IPR". (Literatur-referenca mallongigo: Int.Pedag.Rev.) IPR aperas minimume tri fojojn en la jaro.

4.9.2

La Ligo eldonas internacian Esperanto-revuon por lernejoj kaj komencantoj, Juna Amiko.

4.9.3

Pri aliaj eldonaĵoj decidis la estraro. La konferenca libro estas la respondeco de la konferencprepara teamo.

Artikolo 5

MEMBRECO:

5.1.1

Membreco validas por unu jaro kaj plilongiĝas per la sama periodo.

5.2.1

Membroj kiuj aliĝas pere de sekcio estas Sekciaj Membroj. Membroj loĝantaj en teritorio kie ne estas sekcio, aŭ kiuj aliĝas rekte al la internacia ILEI, estas Individuaj Membroj.

Eks-teksto: Membroj loĝantaj en teritorio kie estas sekcio, estas Sekciaj Membroj. Membroj loĝantaj en teritorio kie ne estas sekcio, estas Individuaj Membroj.

5.2.2

Ĉiu membro povas fariĝi Dumviva Membro pagante dudekoblan jarkotizon.

5.2.3

Honora Membro estas nomita surbaze de siaj meritoj por la Ligo aŭ por la instruado de Esperanto kaj ekde la honorigo ne plu devas pagi membrotizon.

Eks-teksto: Honora Membro estas senpaga membro nomita surbaze de siaj meritoj por la Ligo aŭ por la instruado de Esperanto.

Fino de membreco:

5.3.1

Membro povas fini sian membrecon per skriba sciigo al la Ligo aŭ al la Sekcio.

5.3.2.1

La Ligo aŭ la Sekcio povas eksigi membron pro kontraŭstatuta ago. Ankaŭ unujara nepago de la kotizo estas kontraŭstatuta ago.

5.3.2.2

Kontraŭ la sub 5.4.1 nomita decido eblas apelacii ĉe la Komitato ĝis unu monato post la ricevo de la sciigo. Tiukaze la eksigo estas prokrastata ĝis la decido de la Komitato.

5.3.3

Pri forpaso de membro la Ligo estu informita kiel eble plej baldaŭ.

Artikolo 6

FINANCAJ RIMEDOJ:

6.1.1

Kotizoj de sekciaj membroj devas esti pagitaj al la sekcio antaŭ la unua de marto. La sekcioj devas raporti tiujn membrojn al ILEI antaŭ la 31-a de marto. Individuaj membroj laŭeble membriĝu antaŭ la 31-a de marto.

Eks-teksto: La kotizo devas esti pagita antaŭ la unua de marto, de la sekciaj membroj al la sekcio, de la individuaj membroj al la Ligo.

6.3.1

Heredaĵoj estas akceptataj sub kondiĉo de registrado de la inventaro.

Artikolo 7

LA ORGANIZA STRUKTURO:

La Komitato.

7.1.2

La Komitato konsistas el: Sekciaj Membroj kaj Individuaj Membroj, kiuj elektas komitatanojn laŭ la sekva tabelo:

Nova enkonduka teksto por la regulara komisiono:

7.1.2

La Komitato konsistas el personoj nomumitaj por trijara mandato de la sekcioj depende de la nombro de internaciaj membroj de la sekcio, laŭ la sekva tabelo:

membroj	5-14	15-34	35-49	50-99	100
komitatanoj	1	2	3	4	5

Por ĉiu plia kvindeko da membroj unu plian komitatano. Unu komitatano havas unu voĉon. Mandato de komitatano estas trijara. La komitatano kiu dum sia mandato ĉeestis neniun komitatkunsidon sen skriba klarigo pri tio aŭ ne respondas al leteroj komunikaĵoj direktitaj al la komitatanoj, ne estas reelektebla. En komitatkunsido ĉeestanta komitatano povas reprezenti alia(j)n komitatano(j)n de la sama sekcio aŭ teritorio kiu(j) ne povas

ĉeesti, kondiĉe ke tiu(j) alia(j) komitatano(j) skribe permesas tiun reprezenton. La ĉeestanta komitatano tiam havas la voĉo(j)n de la ne-ĉeestanta(j) komitatano(j).

Komento: Bezonas multan klarigon, kaj restrukturigon. Trijara mandato: difinu la komencpunkton. Jes, unu komitatano havas unu voĉon, sed la reguloj pri anstataŭado devas esti pli klare diritaj. Ne nur aliaj komitatanoj povas anstataŭi, sed ankaŭ ne-komitatanoj. Ni forigu tiujn malelegantajn (j) tra la teksto. Ni plurfoje frontis la demandon, kiom da voĉoj rajtas arigi unu homo. Kelkfoje ni konsentis, ke unu homo rajtas maksimume du voĉojn. Ekzemple, unu X-landa ĉeestanto ne rajtus je ĉiuj kvar X-landaj voĉoj. Aliaj defendas tiun rajton. Ni nepre solvu tion regulare, kaj ne komence de ĉiu komitat-kunsido. Ie ni precizigu ke 'skribe' inkluzivas retskribon (Matanzas akceptis). La anoncado de anstataŭantoj nepre eblu rete (kiel por Kopenhago).

7.1.3

Se la prezidanto kaj la vic-prezidanto de la Ligo ne ĉeestas en komitat-kunsido, la Komitato elektas la kunsid-estron.

7.1.6

La elekto de estraranoj okazas skribe. Kandidatoj estas elektitaj ricevinte la simplan plimulton el la validaj voĉoj. Sindetenoj ne estas validaj voĉoj. En kazo de unu kandidato la kunsidestro rajtas proponi voĉdonon per levo de la manoj. Eksiĝinta estrarano estas unufoje reelektebla, sed eblas pliaj fojoj se du trionoj la Komitato konsentas. En kazo de intertempa ekxiĝo de estrarano la ceteraj estraranoj respondecas pri daŭrigo de ties laboro, ĝis anstataŭanto estas enpostenigita.

Komento: Kaze de demisio, nepras kiel eble plej rapide trovi novulon, la restantaj estrarananoj jam plenforte laboras kaj ne povas longtempe akcepti pliajn devojn, precipe en kazo de kasisto aŭ sekretario, kie fakaj konoj estas bezonataj.

7.1.7

La Kontrola Komisiono pri Financoj konsistas el minimume du membroj; ĝi havas tri-jaran mandaton, kiu komenciĝas en la 1-an de januaro en la jaro post la estrarelekto. Pro la neceso fizike enrigardi dokumentojn dum revizado, la komisionanoj prefere loĝu samlande kun la kasisto.

Eks-teksto: La Kontrola Komisiono pri Financoj konsistas el minimume du membroj kaj vicmembro; el la membroj ĉiujare unu ekxiĝas kaj estas anstataŭata de la vicmembro. Ĉiujare la Komitato elektas novan vicmembron.

7.1.8

Laborkomisiono estas starigata por difinitaj tasko kaj tempodaŭro. Laborkomisiono konsistas el minimume tri membroj, el kiuj minimume unu estas komitatano. Komisiono havas prezidanton, kiu povas, sed ne devas, esti estrarano. Ĉiu komisiono havas respondecan estraron, kiu sekvas ĝiajn laborojn. Laborkomisiono raportas al la estraro laŭ interkonsentita maniero. Pri financoj por laborkomisiono estu skriba interkonsento inter la laborkomisiono kaj la estraro.

7.1.9

Raporton de la prijuĝoj ricevas la estraro, la sekcioj kaj la komisionoj.

Komento: Temas pri la komitata prijuĝo de la jarraporto. Tio kutime okazas per voĉdono en la konferenco, ne per pretigo de skriba raporto. Pripensu ĉu havas sencon.

7.1.10

La Komitato senŝarĝigas la estraron pri la finita administra jaro, se la prijuĝo pri la laboro de la estraro estas pozitiva.

7.1.11

La gvidlinioj estas skribe fiksataj por minimume tri jaroj; intertempe ili povas esti adaptitaj.

7.1.12

La Komitato povas malakcepti sekcion, se ekzistas gravaj duboj pri la ekzistopovo de la sekcio, kaj povas eksigi sekcion en kazo de kontraŭstatuta ago aŭ neplenumo de sia organiza devo.

7.1.13

Ĝi povas senrajtigi komitatanon, se la deleginta sekcio agis kontraŭstatute.

Eks-teksto: Ĝi povas senrajtigi komitatanon, se la sekcio aŭ grupo de individuaj membroj, kiu delegis lin, agis kontraŭstatute.

7.1.14

Ĝi fiksas la membrokotizon por la sekva jaro.

Eks-teksto: Ĝi fiksas la membrokotizon por unu jaro.

7.1.17

En kazo de egaleco de la validaj voĉoj rilate proponon pri aferoj, la propono estas malakceptita. La kunsidestro rajtas postuli duan voĉdonon, eventuale skriban. La membroj de la estraro havas voĉdonrajton, escepte de aferoj pri kiuj ili mem respondecas. En kazo de elekto de personoj validas la elekto-regularo.

Komento: Nebula. Modifo Bratislavo (2004) komitatanigas estraranojn. Kiel interpretu ĉu demando persone koncernas erstranon aŭ ne? Iu ajn propono de la estraro koncernas ĉiujn estraranojn.

7.1.18

En kazo de malfondo de la Ligo la temo devas esti anoncita minimume ses monatojn antaŭ la kvoruma kunsido pritraktonta la temon.

Komento: gravas precizigi, ĉu tia propono povas okazi nur en fizika kunsido, aŭ ĉu reta voĉdono permeseblas. Al la komisiono.

7.2.1

La Estraro rajtas fari operaciajn decidojn inter du kunsidoj de la Komitato, atentante la gvidliniojn nomitajn sub 7.1.11. Principajn demandojn ĝi diskutigas rete kun komitatanoj, kaj laŭbezone okazigas retajn voĉdonojn, laŭ la koncerna regularo. Escepte tiujn de prezidanto, sekretario kaj estrarano pri financoj la estraranoj dividu la funkciojn inter si.

Eks-teksto: La Estraro rajtas decidi pri ĉiuj aferoj inter du kunsidoj de la Komitato, atentante la gvidliniojn nomitajn sub 7.1.11. Escepte tiujn de prezidanto, sekretario kaj estrarano pri financoj la estraranoj dividu la funkciojn inter si.

Komento: La komitato konsentis, ke aperas mallogika kombino de du temoj, kaj rekomendas al la komisiono trovi konvenan manieron apartigi ilin.

7.2.2.1

La Prezidanto:

- kunvokas kaj prezidas la kunsidojn de la estraro kaj de la Komitato;
- reprezentas la Ligon en eksteraj rilatoj;
- respondecas al la Komitato pri ĉiuj agoj de la estraro;
- havas la rajton sin anstataŭigi.

7.2.2.2

La sekretario faras la protokolojn de la estrarkunsidoj kaj la komitato, tenas la kontakton kun la sekcioj, reprezentantoj, individuaj membroj kaj la komitatanoj, kompilas la estraran jarraporton kaj sendas la dokumentojn por la komitatkunsido al la komitatanoj. La sekretario kutime plenumas la membro-administradon, sed tio ne estas deviga.

Komento: Gvidiloj devas precize difini kion signifas “tenas kontakton kun”.

La statuto neniel mencias la membro-administradon! Unu el la plej fundamentaj taskoj – kutime sekretaria. Sed videblas virto, ke ĝi estu apartigebla de la sekretaria posteno. Ties tasko estas enorma. Ni konstruu strukturon laŭ kiu ĝi povus esti prizorgita alimaniere – ekzemple de volontulo au ‘oficisto’. La lasta frazo ne akceptita, sed plusendita al la komisiono.

7.2.2.3

La estrarano pri financoj registras ĉiujn en- kaj elspezojn de la Ligo, zorgas pri la enkasigo de la kotizoj, faras la finanĉan jarraporton, bilancon, kaj la buĝeton por la sekva jaro kaj sendas tiujn dokumentojn al la komitatanoj.

7.2.2.4

La ceteraj membroj zorgas pri:

- la organiza stato de la Ligo;
- entrepreno kaj ebla efektivigo de agoj kiuj povas servi al la celoj de la Ligo.
- realigo de agadplanoj kaj kunlaborigo de sekcioj en la kampoj sub sia respondeco.

7.2.3

La prezidanto, la sekretario kaj la estrarano pri financoj eksiĝu en sinsekvaj jaroj. Sama sistemo validas pri la ceteraj estraranoj, eksiĝantaj unu- ĝis tri-ope. Tamen vicprezidanto eksiĝas ne samtempe kun la prezidanto kaj vicsekretario ne samtempe kun la sekretario.

Komento: La komitato decidis verŝajne en 2003 ne plu apliki ĉi tion. Fakte ni neniam aplikis ghin. Estu trijara mandato kun kohera teamo. La tuta alineo estu forigita. La komisiono konsideru loki aliteman tekston ĉi tie.

7.2.4

La estraro sendas siajn kaj ricevitaĵajn proponojn al la komitatanoj minimume tri monatojn antaŭ la venonta kunsido.

Proponata teksto:

La estraro komunikas siajn kaj ricevitaĵajn proponojn por diskuto en sekva fizika komitatkunsido al la komitatanoj almenaŭ monaton antaŭ tiu kunsido. Tiuj proponoj havas prioritaton antaŭ poste aŭ surloke anoncigitaj proponoj.

Komento: Anakronismo, eksdata koncepto, ke ne eblas diskuti ion ajn nesenditan tri monatojn pli frue.

7.2.5

La skribaj raportoj de la sekretario kaj de la estrarano pri financoj kaj la buĝeto estas sendataj al la komitatanoj minimume tri monatojn antaŭ la komitatkunsido.

Proponata teksto:

La jarraporton kompilas la sekretario laŭ kontribuoj de estraranoj kaj komisiitoj. La estraro kune respondecas pri ĝi. Ĝi inkluzivas la financajn raportojn. Tiuj raportoj estas disponigitaj al komitatanoj almenaŭ unu monaton antaŭ la komitatkunsido.

Komento: Tra jaroj tio ne okazis. Eĉ kiam "sendi" estas tuja kaj ne helikpoŝta. En retepoko, monato sufiĉas. Prefere "disponigi" ol "sendi". Buĝetojn ni pretigas ekde oktobro; ili estas rete traktitaj.

Sekcioj kaj reprezentantoj.

7.3.1

Sekcioj agas en difinita teritorio, kiu estas priskribita interkonsente kun la estraro.

7.3.2

Sekcioj strebas al leĝa stato, dezirinda por plifaciligi kontaktojn kun registaraj instancoj.

7.3.3.1

Sekciestro devas esti membro de la Ligo almenaŭ du jarojn antaŭ la elekto-jaro kaj resti membro tra la tuta mandato.

Proponata teksto:

Sekciestro devas esti internacia membro de la Ligo en la jaro antaŭ la ekstrakto de sekcia aliĝpeto kaj resti membro tra la tuta mandato. Nove nomumita sekciestro devas esti kaj resti internacia membro de ILEI.

Komento: Ŝanĝita en Parma de du al unu jaro (sed ne realigita), konfirmita en Matanzas kaj per reta voĉdono. "elekto-jaro", kion tio signifas – elekto de kiu?

7.3.3.2

La elekto de sekciestro estas sciigata al la Estraro de la Ligo, kiu konfirmas la mandaton de la sekciestro.

7.3.3.3

La sekciestro havas trijaran mandaton kaj estas reelektebla. Li reprezentas la Ligon en la koncerna teritorio.

Proponata teksto:

La sekciestro havas trijaran mandaton, estas reelektebla kaj reprezentas la Ligon en la koncerna teritorio. La mandato finiĝas, same kiel tiuj de la sekciaj komitatoj, en la 31a de marto en la jaro antaŭ la elekto de nova estraro de ILEI.

Komento: Necesas difini la komencon kaj finon de la mandato. Kial "li"?

7.3.3.4

La sekciestro respondecas pri la pago de la kotizo antaŭ la 31a de marto kaj samtempa sendo de la membrolisto al la sekretario kaj la estrarano pri financoj de la Ligo.

Proponata teksto:

La sekciestro respondecas pri la pago de la kotizoj por siaj sekciaj membroj antaŭ la 31a de marto kaj samtempa sendo de la membrolisto al la sekretario kaj la estrarano pri financoj de la Ligo.

Komento: Temas pri pli ol unu kotizo.

7.3.3.5

La sekciestro prizorgas la jaran statistikon pri la instruado de Esperanto en sia teritorio.

7.3.3.6

La sekciestro respondas al la cirkuleroj kaj al skriba voĉdonado maksimume 40 tagojn post ilia forsendo de la sekretario de la Ligo.

Nova teksto:

La sekciestro respondas al retaj komunikoj bezonantaj respondon ene de 10 tagoj post ilia forsendo de la sekretario aŭ alia estrarano de la Ligo, kaj al tiaj fizikaj komunikaĵoj ene de 40 tagoj. La sekciestro plusendas publikajn komunikojn de ILEI al la sekciaj membroj.

Komento: 40 tagoj apartenas al bibliaj tempoj, ne ret-epokaj. Sekciestroj ne voĉdonas, nur komitatanoj. Ofte komunikoj bezonas ne respondon sed plusendon.

7.3.3.7

La sekciestro informas la sekretario de la Ligo pri la ŝanĝoj en la sekcia estraro.

7.3.3.8

La mandato de sekciestro finiĝas se tiu dum pli ol unu jaro ne sendis raporton pri la sekcia agado, daŭre ne plenumas taskojn en la sekcio aŭ ne zorgas pri la sekcia reprezentiĝo en komitatkunsido.

7.3.3.9

La Estraro povas proponi al la Komitato ĉesigi la mandaton de sekciestro.

7.3.4.1

Reprezentanto devas esti membro de la Ligo almenaŭ unu jaron antaŭ la elekto-jaro kaj resti membro tra la tuta mandato.

Nova teksto:

Reprezentanto-kandidato devas esti internacia membro de la Ligo en la jaro de la peto-ektraktado, kaj post akcepto, devas resti tia membro tra la tuta mandato.

Komento: Oni diris ke en Parma (2006) la komitato ŝanĝis tion. Sed raporto pri la kunsidoj ne mencias tion. Trovas la protokolo. La komitato akceptis la principon. Surprize, mi nenie trovas postulon, ke en lando kun reprezentanto estu iuj pliaj homoj, nek eĉ ke ili estu membroj de enlanda sekcio. Tio asperu en gvidilo por reprezentantoj.

7.3.4.2

Reprezentanton nomas kaj malnomas la Estraro, informinte la Komitaton pri tio.

7.3.4.3

Reprezentanto servas al la membroj kaj reprezentas la Ligon en sia teritorio kaj klopodas starigi sekcion.

7.3.4.4

Reprezentanto havas trijaran mandaton kaj estas reelektebla, laŭ samaj templimoj kiel sekciestroj.

7.3.4.5

La mandato de reprezentanto finiĝas se stariĝis sekcio en la koncerna teritorio.

7.3.4.6

La reprezentanto prizorgas la jaran statistikon pri la instruado de Esperanto en sia teritorio.

7.3.4.7

La reprezentanto respondas al la cirkuleroj maksimume 40 tagojn post ilia forsendo de la sekretario de la Ligo.

Proponata teksto:

Reprezentantoj respondas aŭ plusendas cirkulerojn same kiel sekciestroj.

7.3.4.8

La Estraro povas ĉesigi la mandaton de reprezentanto se tiu dum pli ol unu jaro ne sendis raporton pri sia agado aŭ daŭre ne plenumas taskojn en sia teritorio.

7.3.4.9

Kontraŭ la ĉesigo la reprezentanto rajtas apelacii al la Komitato, kiu decidas.

7.3.5

Sekcioj kaj reprezentantoj nomumas komitatanojn laŭ artikolo 7.1.2.

7.3.7

Sekcioj kaj reprezentantoj:

- okupiĝas pri varbado de membroj kaj de simpatiantoj-donacantoj;
- respondecas pri la korespondado kun la sekretario de la Ligo;
- raportas skribe al la sekretario, antaŭ la 31a de marto, pri siaj agoj kaj atingoj dum la pasinta jaro,

Proponata teksto

- pri la agoj kaj atingoj de la sekcio dum la pasinta jaro, prefere pere de respondiloj kreitaj tiucele.

Komento: Sekciestro ne raportas pri siaj personaj agoj kaj atingoj, sed tiuj de la sekcio. Uzo de respondilo ebligas komparojn kaj analizojn inter sekcioj.

=====

Estas kelkaj perspektive aldonendaj punktoj, certe sub 9, pri la kondiĉoj por ŝanĝi Statuton, Regularojn kaj Gvidilojn. La komisiono pretigos pri tiaj demandoj proponojn – espereble ĝis Kunming. La PPT-dokumentoj listigas en la lasta lumbildo kelkajn el tiuj temoj.

Kompilo: SMG, la 27an de decembro, 2011.